



JABATAN PERDANA MENTERI  
JABATAN AUDIT NEGARA

## **KENYATAAN MEDIA KETUA AUDIT NEGARA**

---

1. Terlebih dahulu patik merafak sembah menjunjung kasih ke bawah Duli Yang Maha Mulia Seri Paduka Baginda Yang Di Pertuan Agong atas perkenan melantik patik sebagai Ketua Audit Negara mulai 13 Jun 2023.
2. Selari dengan peranan dan fungsinya, saya komited untuk bersama-sama warga Jabatan Audit Negara dalam usaha mentransformasi dan menstrukturkan semula sistem pengauditan serta memantapkan pengurusan kewangan negara.
3. Kepercayaan orang ramai terhadap sektor awam sebahagian besarnya adalah berdasarkan persepsi dalam aspek kecekapan, kebolehpercayaan dan kejujuran yang dipamerkan. Justeru, sektor awam perlu beroperasi dengan kompeten, amanah, jujur dan berintegriti.
4. Institusi-institusi Kerajaan mesti bertanggungjawab sepenuhnya terhadap wang yang dibelanjakan. Setiap perbelanjaan haruslah memberi impak positif kepada kehidupan rakyat Malaysia.
5. Pengauditan ke atas penyata kewangan tahunan dan laporan prestasi agensi awam merupakan tanggungjawab utama yang digalas oleh Jabatan Audit Negara. Keutamaan saya pada ketika ini adalah untuk mengukuhkan peranan ini serta memastikan sistem audit sektor awam kekal mampan dan lestari.
6. Jabatan Audit Negara akan sentiasa peka dan prihatin dalam menjalankan kuasa pengauditan untuk memeriksa dan menyiasat pengurusan wang awam dengan tumpuan kepada kepentingan rakyat dan akauntabiliti Kementerian dan Jabatan Kerajaan terhadap wang pembayar cukai yang dibelanjakan.

7. Bagi tujuan tersebut, Jabatan Audit Negara akan terus menjalin kerjasama dengan semua pihak termasuk agensi awam dan badan lain yang berkaitan demi kesejahteraan rakyat dan kemakmuran negara.
8. Berbekalkan pengetahuan dan pengalaman selama 29 tahun dalam perkhidmatan awam termasuk jawatan terakhir saya sebagai Ketua Pegawai Eksekutif Institut Integriti Malaysia (IIM), saya komited dan beriltizam untuk memacu Jabatan Audit Negara menjadi sebuah institusi audit yang unggul.

**Datuk Wan Suraya Wan Mohd Radzi**  
**Ketua Audit Negara**  
**21 Jun 2023**